



ILIDŽA

INFORMATIVNI BILTEN
OPĆINE ILIDŽA

Ilidža • Juli/August 2017
• Broj 162



ALIJA HADŽIMURATI

pobjednik Festivala narodne muzike "Ilidža 2017"

AAP
electron



Obilježena 25. godišnjica Četvrte viteške brigade



Polaganjem cvijeća na centralno spomen-obilježje Ilidža i svečanom sjednicom Općinskog vijeća Ilidža 27. jula 2017. obilježena je 25. godišnjica Četvrte viteške motorizovane brigade. Predsjedavajući Općinskog vijeća Ilidža Muhamed Omerović rekao je da Četvrta viteška motorizovana brigada nije samo simbol odbrane Hrasnice i Ilidže, već i Sarajeva i države Bosne i Hercegovine.

“I ove godine s posebnim poštovanjem i velikim ponosom obilježavamo ovu značajnu godišnjicu i na taj način pokazujemo neizmjernu zahvalnost i poštovanje prema šehidskim porodicama čiji su najbliži za ovo što imamo danas dali najvrjednije što su imali”, rekao je Omerović. Načelnik Općine Ilidža prof. dr. Senaid Memić kazao je da Općina Ilidža će i dalje pružati podršku boračkoj populaciji, a naglasio je i važnost obilježavanja godišnjica zbog čuvanja uspomene na herojsku borbu.

“Pozivam Vas da svako od nas uradi ono što je do nas, da se opet okupimo i gdje god možemo obiđemo mjesta i skupove koje podsjećaju na herojsku borbu, da budemo iskreni, budemo korisni i servis onim koji trebaju sad našu pomoć. Budimo složni i ispravimo neke greške koje smo imali jedni prema drugima. Budimo svi učesnici razvoja, razvijajmo privredu, turizam, obrazovanje, ali nikad ne zab-

oravimo one koji su nam to omogućili” rekao je načelnik Memić.

Na važne zasluge Četvrte viteške brigade podsjetio je Emir Redžović tokom obraćanja na svečanoj sjednici.

“Prošlo je 25 godina od kada smo svi ustali kao jedan protiv vojno nadmoćnijeg neprijatelja i okupatora, braneći svoja ognjišta i slobodu. Slavni put brigade i njenih ratnika i gazija časno je ispisan krvlju i žrtvom. Jedinica je uspjela tokom čitavog rata očuvati slobodne prostore Ilidže, a time i kapije glavnog grada BiH. Teritorija koju je držala na početku rata nije se smanjila ni pedlja, samo je proširena, a jedinica je učestvovala u velikom broju operacija od Ilidže, pa do Krajine” riječi su Emira Redžovića, predsjednika Udruženja Četvrta Viteška motorizovana brigada.

Predsjednik Udruženja 4. Viteška motorizovana brigada Emir Redžović pozvao je na prisustvo i ostalim aktivnostima kojima se i ove godine obilježavala 25. godišnjica.

Na sjednici Vijeća je posebno bilo dirljivo obraćanje sestre Selme Galešić, djevojke koja je bila teško ranjena i koja je sada u kolicima u Francuskoj, Sanje Galešić. Njihovu majku Jagodu Galešić su kidnapovali iz konvoja pod zaštitom vojnika UN-a 15. maja 1992. godine, a potom ubili na brutalan način.



“Moja majka je rizikovala svoj život i zbog njene humanosti, njene dužnosti kao medicinske sestre i majčinske ljubavi prema svom djetetu doživjela je takvu sudbinu. Molim vas pomozite nam da dođemo do istine i pravde. Potrebna nam je vaša pomoć da naša majka i ranjenici ne budu zaboravljeni i da naredbodavci budu kažnjeni. Tražimo od nadležnih institucija BiH, prven-

stveno državnog tužilaštva koje je otvorilo predmet u ovom slučaju da do kraja izvede cijeli postupak” i da se pred lice pravde dovedu zločinci” kroz suze je rekla Sanja Galešić čitajući poruku Selme Galešić, njene sestre. Uručene su i plakete zaslužnim pojedincima. Centralna manifestacija je održana 28. jula na trgu ispred Doma kulture u Hrasnici.





Potpisan sporazum za regulaciju rijeke Dobrinje

U prostorijama Kantona Sarajevo 29. augusta 2017. godine ministar privrede KS Muharem Šabić i načelnici općina Ilidža, Hadžići, Trnovo, Vogošća i Ilijaš prof. dr. Senaid Memić, Hamdo Ejubović, Ibro Berilo, Edin Smajić i Akif Fazlić potpisali su sporazume kojima će se omogućiti sufinansiranje realizacije osam projekata iz „Programa uređenja riječnih korita i zaštite od poplava, vodosnabdijevanja i odvodnje otpadnih voda na području Kantona Sarajevo za 2017. godinu“.

Prema riječima ministra Šabića za 12 projekata koji će se realizovati kroz ovaj program Vlada KS je izdvojila 1.500.000 KM. Ministar Šabić je rekao da Ministarstvo privrede svake godine ulaže u slične programe uređenja obala vodotoka, kao i da su prioritet one kod kojih postoji opasnost od poplava.

Sredstva u iznosu od 140.000 KM namijenjena su za regulaciju rijeke Dobrinje u Mjesnoj zajednici Stup II na području općine Ilidža.

„Ilidža ima devet rijeka o kojima se treba brinuti od Večerice do Rakovičkog potoka. Sredstva ćemo utrošiti za čišćenje rijeke Dobrinje koja ide kroz naselje. Općina Ilidža će utrošiti transparentno sredstva prema namjeni. Možemo puno toga još uraditi te apelujem i na svijest ljudi da čuvaju svoju okolinu i da učinimo prostore oko rijeka ugodnim ambijentom za šetnju, vožnju biciklom i uživanje“ izjavio je načelnik prof. dr. Senaid Memić.



Potpisan sporazum za sanaciju krovova na području općine Ilidža

Načelnik Općine Ilidža prof. dr. Senaid Memić i ministar prostornog uređenja, građenja i zaštite okoliša Kantona Sarajevo Čedomir Lukić, 16. augusta u Općini Ilidža potpisali su Sporazum o sufinansiranju izvođenja radova na zajedničkim dijelovima zgrada (sanacija krovova) na području općine Ilidža. Ovim sporazumom Ministarstvo će sufinansirati radove za sanaciju krovova zgrada zajedničkog stanovanja u iznosu od 70.000, a Općina će izdvojiti 50.000 KM.

„Radi se o opravci krovova koji su oštećeni u ratu i koji do sada nisu sanirani, a u kritičnom su stanju i ova sredstva su prilika da se oprave i stvore normalni uslovi za život njenih stanara“, kazao je načelnik Memić.

Sredstva će Ministarstvo uplatiti na račun Općine koja će provesti kompletnu proceduru potrebnu za realizaciju ovog projekta. Ministar Lukić je ovom prilikom istakao da su to sredstva kojim raspolažu u okviru budžeta i da nisu dovoljna da se zadovolje sve potrebe za sanacijom, te da će se pored ovog projekta u ovoj godini uraditi i utopljanje tri škole na Ilidži.



Federalnoj upravi CZ Općina Ilidža uručila pet podvodnih detektora

U prostorijama Općine Ilidža, 10. avgusta 2017. godine izvršena je primopredaja pet metal detektora namijenjenih za specijalne zadatke otkrivanja neeksplozivnih ubojnih sredstava pod vodom. Ova oprema, koju je općina Ilidža ustupila na korištenje Federalnoj upravi civilne zaštite (FUCZ) za potrebe podvodnog deminiranja uveliko će pomoći ronilačko-pirotehničkom timu, a i drugim timovima FUCZ, u zadacima uklanjanja minsko-eksplozivnih sredstava iz rijeka i jezera zaostalih iz ratova vođenih na ovim prostorima. Opremu je direktoru Federalne uprave CZ Fahrudinu Solaku uručio načelnik Općine Ilidža prof. dr. Senaid Memić. Za nabavku ove opreme Općina Ilidža je iz budžeta izdvojila 68.913 KM. „Općina je u proteklom periodu izdvojila značajna finansijska sredstva za deminiranje oko 7.000.000 metara kvadratnih rizične površine, a nabavku ove opreme smatram opravdanom jer će se spasiti mnogi ljudski životi i stvoriti uslovi za siguran život i rad“, kazao je načelnik Memić. Radi se o dva metal detektora proizvođača „Vallon“ sa dodatnom cijevi i zaštitom za elektroniku (tip MW1630B) i tri metal detektora istog proizvođača (tip VMW-1). Svih pet metal detektora namijenjeni su za otkrivanje minsko-eksplozivnih sredstava pod vodom, s mogućnošću korištenja i na kopnu, s tim da se kod korištenja pod vodom dva detektora mogu koristiti do 55, a tri do 30 m dubine. Ovi detektori doprinjet će efikasnijem radu ronilačko-pirotehničkog tima FUCZ a njihova upotreba predviđena je već početkom naredne sedmice u okviru dvije ovogodišnje ekspertne misije uklanjanja i uništavanja avionskih bombi u rijeci Savi u Bosanskom Brodu, koja je već u toku, i misije uklanjanja minsko-eksplozivnih sredstava i neeksplozivnih ubojnih sredstava u rijeci Drini kod Goražda.





Za rekonstrukciju elektroinstalacija u Domu Zdravlja Ilidža 100.000 KM

Općina Ilidža i JU Dom zdravlja Kantona Sarajevo u prostorijama Općine Ilidža, 18. avgusta 2017. godine potpisali su Sporazum o namjenskom korištenju sredstava za sufinansiranje projekta rekonstrukcije elektroinstalacija u objektu Doma zdravlja Ilidža. Ovim Sporazumom Općina Ilidža je iz budžeta odobrila sredstva u iznosu od 100.000 KM za rekonstrukciju elektroinstalacija koje su dotrajale i predstavljaju opasnost da izazovu požar što bi imalo dalekosežne posljedice za rad ove zdravstvene ustanove. Sporazum su potpisali općinski načelnik prof. dr. Senaid Memić i direktor JU Dom zdravlja Kantona Sarajevo Fuad Husić.

„Općina kontinuirano vodi računa o zdravstvu na Ilidži i finansijski ga podržava kako bi pružanje zdravstvenih usluga našim stanovnicima bilo što bolje. I u narednim godinama ćemo, u okviru naših mogućnosti, pomagati i ulagati u zdravstvo na Ilidži“, kazao je u svom obraćanju načelnik Memić.

Direktor JU Dom zdravlja Kantona Sarajevo Fuad Husić je ovom prilikom zahvalio Općini Ilidža i njenom načelniku Memiću na dosadašnjoj uspješnoj saradnji i kontinuiranoj pomoći za stvaranje povoljnijih uslova u cilju pružanja kvalitetnijih zdravstvenih usluga na području općine Ilidža.



Općina za Šestu osnovnu školu izdvojila 104.765,00 KM

U sklopu projekta UNDP-a “Zeleni ekonomski razvoj - Povećanje energetske efikanosti u javnom sektoru u BiH” izabrano je šest javnih objekata koji će se rekonstruisati u toku 2017. godine među kojima je i objekat Šeste osnovne škole.

Mjere povećanja energetske efikasnosti na objektu Šeste osnovne škole koštati će 366.670,00 KM. Kanton Sarajevo, odnosno Ministarstvo prostornog uređenja, građenja i zaštite okoliša učestvovat će sa 261.905, 00 KM, a Općina Ilidža sa 104.765,00 KM.

Krajnji cilj projekta “Zeleni ekonomski razvoj” je doprinijeti kreiranju povoljnog okruženja za investicije u energetske efikasnost u BiH.

U sklopu projekta u Šestoj osnovnoj školi uradit će se termoizolacija ravnog krova, zamjena fasadne stolarije, ugradnja vanjskih prozorskih klupica na svim prozorima, zamjena unutarnjih prozorskih klupica, termoizolacija vanjskih zidova, obrada sokla, postavljanje gromobranskih instalacija, kao i zamjena kotla-lož ulje na pelet.

Delegacija kineske korporacije Powerchina u posjeti Općini Ilidža

Delegacija kineske korporacije Powerchina predvođena Hong Kunom, generalnim menadžerom posjetila je 25. jula Općinu Ilidža.

Načelnik Općine Ilidža prof. dr. Senaid Memić upoznao ih je sa potencijalima ove općine i predložio saradnju na kapitalnim projektima. Nakon što je načelnik Memić prezentirao projekt Nova Ilidža, gosti su izrazili nadu za sagledavanje mogućnosti finansijskog ulaska u ovaj projekt. Kineska korporacija Powerchina posjeduje punu paletu mogućnosti, od planiranja, istraživanja, projektiranja i inženjeringa do finansiranja, izgradnje, instalacije i rada i održavanja energetskih i infrastrukturnih projekata. Kao industrijski lider u hidroenergetskoj i vodenoj zaštiti, uvijek promoviraju tehnološke inovacije.

Kako je rečeno na sastanku vizija Powerchine je postati vrhunsko svjetsko poduzeće u obnovljivoj energiji i razvoj hidroenergetskih resursa, ključni igrač u infrastrukturnom sektoru i pokretačka snaga u industriji energetike i vode, kao i važan sudionik u nekretninama.

U 2015. godini Powerchina je imala ukupnu aktivu od 70,4 milijarde USD i 200.000 zaposlenika. Godišnji prihod u 2014. godini iznosio je 42,4 milijarde USD. POWERCHINA je 2015. rangirana na trećem mjestu u ENR Top 150 globalnim dizajnerskim firmama i 30. u ENR Top 225 međunarodnim dizajnerskim firmama.





Nastavljeni radovi na saobraćajnici sa tramvajskim pojasom Ilidža-Hrasnica

Na području općine Ilidža nastavili su se radovi izgradnje saobraćajnice sa tramvajskim pojasom Ilidža-Hrasnica, u dužini 260 metara. Izvođač radova je Konzorcij MGBH d.o.o i Sarajevoputevi d.d.

Ugovorena vrijednost radova je 423.133,93KM. Stručni nadzor povjeren je Zavodu za izgradnju Kantona Sarajevo. Radovi će trajati 90 dana. Općina Ilidža rješava i imovinsko-pravne odnose.

Ugovorom o izvođenju je planirano da izvođač uradi desnu kolovoznu traku i to široki iskop, nasipanje zamjenskog materijala, polaganje oborinske kanalizacije, izradu donjeg i gornjeg stroja puta i izgradnju javne rasvjete. Radi se kolovoz sa dvije saobraćajne trake širine 3,5 metra, pješačka i biciklistička staza širine šest metara, a uređuje se i tramvajski pojas širine 8,5m.



Sanacije Velike Aleje

Općina Ilidža je potpisala sporazum sa Javnom ustanovom za zaštićena područja Kantona Sarajevo o sufinansiranju projekta rekonstrukcije Velike aleje.

Ugovorom je definisano da će Općina Ilidža, Javna ustanova i Kanton Sarajevo zajednički raditi na realizaciji sanacije Velike aleje, a kao interventni potez je asfaltiranje udarnih oštećenja. Javna ustanova prebacila je Općini Ilidža 150.000 KM za te namjene. Općina Ilidža je provela proceduru izbora izvođača radova i izabrana je firma JKPP "Rad". U julu su okonači radovi sanacije udarnih rupa u atraktivnom šetalište od banjsko - turističkog naselja Ilidža do Vrela Bosne, zasađeno stablima platana i kestena u dužini od 3,5 km.

S obzirom da su ovo samo interventne aktivnosti i dalje će sve navedene institucije zajednički raditi kako bi relizovali kompletan Projekat sanacije Velike aleje.

Velika aleja, predstavlja najljepši drvodred u Bosni i Hercegovini. Aleju sačinjavaju 726 stabla javorolisnog platana, sađenih u dva reda 1892. godine, te desetine stabala divljeg kestena, koji su sađeni 1888. godine.



U toku regulacija Dobrinje

Na području općine Ilidža u toku su radovi regulacije korita Dobrinje. Dužina regulacije u ovoj fazi je 190 metara. Izvođač je firma Orman, a investitor Općina Ilidža u vrijednosti 420.000 KM. Ovim projektom uradit će se korito u širini devet metara, visine zidova oko tri metra te betonirati dno 30 cm. U toku su i radovi čišćenja korita rijeka Željeznice, Večerice i Dobrinje. Radove izvodi Javno preduzeće Ilidža, a finansira Općina Ilidža, a sve u skladu sa usvojenim planom i programom ove firme od strane Općinskog vijeća Ilidža.





Održan Festival narodne muzike “Ilidža 2017”



Ilidžanski festival je kulturno blago svih Bosanaca i Hercegovaca, ali i onih kojima je narodna pjesma u srcu. Velika imena počinjala su karijeru upravo na sceni ilidžanskog festivala. Tu su nastali najveći hitovi, a svoje blistave karijere započeli su najveći interpretatori sevdalinki, te smo uvjereni da je i ovogodišnji festival ponudio nove muzičke stvaraoce i interpretatore.

Općina Ilidža je tradicionalni organizator i nosilac većine obaveza organizacije ilidžanskih festivala, a cjelokupnu realizaciju kulturno-muzičke manifestacije Festivala “Ilidža 2017.” kao i direktan TV prijenos povjeren je treću godinu, Hayat TV.

Ilidžanski festival, koji ima dugogodišnju tradiciju, ujedno je i odgovornost prema muzici. Tim profesionalaca, muzičkih znalaca, okupljenih oko pripreme i realizacije festivala učinio je sve kako bi festival u skorijoj budućnosti postao najveći regionalni muzički festival. Od 26. do 29. jula 2017. Ilidža je bila mjesto okupljanja i njegovanja tradicionalnih vrijednosti kroz narodnu pjesmu i običaje. Obraćanjem načelnika Općine Ilidže prof dr. Senaida Memića, 26. jula 2017. na Ljetnoj pozornici zvanično je otvoren Festival narodne muzike Ilidža 2017. Za sve posjetioce, na Ilidži, ali i gledateljima koji su festival pratili uživo u programu Hayat TV-a, želja je bila vratiti lijepa sjećanja, sjećanja na ljude koji su najbolji autori, izvođači i svi muzički sudionici Ilidžanskih festivala. Noć Festivala posvećena je „Čuvarima tradicije“, čuvarima izvorne narodne pjesme.

Na Ljetnoj pozornici 27. jula održano je takmičenje “Prva harmonika” na kojem su ove godine, za razliku od prošle, učestvovali harmonikaši iz cijelog regiona, a žirijem je predsjedavao Edo Krilić. Odlukom žirija “Prva harmonika” je Aleksandar Nikolić. Majstorske izvedbe ocjenjivao je stručni žiri u sastavu: Edo Krilić, Slobodan Vidović, Dinko Mujanović i Ljubiša Pavković. U prvom krugu takmičenja, u pet starosnih kategorija učestvovalo je tridesetak takmičara iz BiH, Srbije, Njemačke, Francuske i Austrije, a dalje se plasiralo njih osam koji su zadovoljili postavljene kriterije i stekli pravo nastupa u finalnoj noći.





Pobjednička pjesma takmičarske noći narodne muzike, koja se održavala 28. jula je pjesma "Golubovi" u izvedbi Alije Hadžimuratija. Autor teksta pobjedničke pjesme je Nihad Ramić, dok je muziku i aranžman pisao Eldin Huseinbegović.

Ukupno dvadeset takmičarskih pjesama je otpjevano na sceni, a dodijeljene su još četiri nagrade. Mirza Balić osvojio je nagradu za najbolji aranžman za pjesmu "Esma", nagradu za najbolju muziku osvojio je Pavao Anić za pjesmu "Mostar grade", Amra Daka i Amir Šehić osvojili su nagradu za najbolji tekst za pjesmu "Sjeti se", a Nihad Kazić Šike je osvojio nagradu za najbolju interpretaciju za pjesmu "Azemina".



O pobjednicima je odlučivalo devet članova stručnog žirija, i to Enes Begović, Ivica Šarić, Ognjen Bomoštar, Fahrudin Pecikoza, Radoslav Grajić, Hanka Paldum, Ana Babić, Ibrahim Mangafić, Tomislav Kašljević i Direkcija Festivala. Nagrade pobjednicima uručio je načelnik Općine Ilidža Senaid Memić. U revijalnom dijelu programa takmičarske noći nastupili su Azemina Grbić, Andrija Števanović, Dragan Kojić Keba, te Nazif Gljiva, koji je premijerno otpjevao dvije nove i pet starih pjesama.

Koncertom Velikani narodne muzike 29. jula završen je Festival narodne muzike Ilidža 2017. Na ljetnoj pozornici pjevali su Enes Begović, Ana Babić, Nedžad Salković, Ibrica Jusić, Eldin Huseinbegović, Mladen Tomić, Hasiba Agić, Hamid Ragipović, Branka Sovrlić, Hanka Paldum... Gosti večeri bili su članovi Udruženja Saray sevdah.





Projekcije SFF i na Ilidži

Ove godine Općina Ilidža se potrudila kako bi svojim građanima pružili bar dio atmosfere koja vlada za Sarajevo Film Festival u glavnom gradu.

Osim sve veće potrebe građana za kulturnim dešavanjima, usljed ubrzanog razvoja turizma i Ilidžanci su imali priliku uživati u projekcijama najnovijih svjetskih ostvarenja kad je film u pitanju. Nekadašnje kino Igman postalo je mjesto susreta ljubitelja filma. Posjetiocima je prikazano 12 filmova. U prepunoj kino sali tražila se karta više za projekciju filma Zaba, a slična situacija bila je sa projekcijom filma "Muškarci ne plaču".

Saradnja kina "Igman" sa SFF-om kruna je napora Općine Ilidža koja je kupila kino projektor u vrijednosti 124.875,47 KM, a koji je domaća kompanija IMTEC Soutions instalirala.



Poticaj mladim nezaposlenim sa Biroa

Načelnik Općine Ilidža prof. dr. Senaid Memić donio je Pravilnik o kriterijima, načinu i postupku dodjele budžetskih sredstava za poticaj razvoju poduzetničke inicijative mladih na području općine Ilidža, kojim se utvrđuju uslovi, kriteriji, postupak dodjele budžetskih sredstava za poticaj razvoju poduzetničke inicijave mladih u osnivanju samostalnih djelatnosti i privrednih društava, izvor sredstava, namjena korištenja sredstava, kao i druga pitanja. Svrha donošenja ovog Pravilnika je podrška mladim za razvoj poduzetničkih inicijativa koja će omogućiti: stvaranje novih radnih mjesta kroz zapošljavanje mladih osoba sa evidencije nezaposlenih kao i povećanje broja samostalnih djelatnosti i privrednih društava na području općine Ilidža.

Planirana Budžetska sredstva u 2017. godinu u iznosu od 50.000,00 KM - Grant za poticaj privatnim preduzećima i poduzetnicima će se koristiti za poticanje poduzetničke inicijative kroz takmičenje poslovnih ideja i održivih poslovnih planova. Javni poziv za finansiranje i sufinansiranje najboljih poslovnih planova sredstvima Budžeta Općine Ilidža namijenjenih razvoju poduzetničke inicijative mladih sa područja općine Ilidža objavljen je 25. jula i i prijave su se mogle predavati 30 dana. Na osnovu javnog poziva odabraće se najbolji poslovni planovi mladih i novčano nagraditi. Novčana nagrada namijenjena je sufinansiranju troškova pokretanja biznisa kroz finansiranje troškova registracije biznisa, troškova sredstava za rad, zakupa poslovnih prostorija, obrtnih sredstava, i ostalih troškova. Visina nepovratnih sredstava po poslovnom planu može iznositi maksimalno do 5.000,00 KM.

Prilika za nove investicije i radna mjesta

Istaknutim privrednicima sa područja općine Ilidža, Fondaciju BIGMEV 12. jula 2017. godine u Općini Ilidža prezentirao je Samir Vildić, direktor BIGMEV-a za BiH. Na sastanku se razgovaralo o mogućnostima dalje saradnje Fondacije i Foruma privrednika općine Ilidža i svim aktivnostima koje bi unaprijedile rad ovih privrednika, što bi na kraju doprinijelo cjelokupnom razvoju i Općine Ilidža.

" Ciljevi Fondacije su povećanje investicija iz Turske u BiH, povećanje izvoza iz BiH u Tursku, formiranje strateške suradnje po principu reciprociteta, pokretanje održive suradnje između privrednika dviju zemalja, razvoj projekata koji će omogućiti uključjenje bh. dijaspore i doprinos razvoja Bosne i Hercegovine," rekao je Vildić.

Dogovorena je da će privrednici iz Foruma privrednika sa načelnikom Općine prof. dr. Senaidom Memićem posjetiti istanbulsku općinu Zeytinburnu u septembru 2017., zbog bratimljenja sa Općinom Ilidža, a i uspostavljanja privredne saradnje privrednika dvije općine.

Fondacija BIGMEV osnovana je 2010. godine u Istanbulu, sa sjedištima u Bursi i Sarajevu, a u cilju razvoja ekonomskih, kulturnih i naučnih aktivnosti između Turske i Bosne i Hercegovine. Na čelu Fondacije je turski privrednik Muzafer Cilek, porijeklom iz BiH.

Općina Ilidža izdvojila 10.000 za izradu nišana i spomen-obilježja šehidima i poginulim braniteljima

Općina Ilidža izdvojila je 10.000 KM za sufinansiranje izrade i postavljanja nišana i spomen-obilježja šehidima, poginulim borcima i umrlim braniteljima Armije BiH, koji su ukopavani na grobljima na području Kantona Sarajevo, kojima upravlja Fond Kantona Sarajevo za izgradnju i očuvanje grobalja šehida i poginulih boraca, memorijalnih centara i spomen obilježja žrtava genocida.

Tim povodom 17. jula 2017. godine potpisan je i sporazum o sufinansiranju projekata Fonda.

Sporazum su potpisali načelnik Općine Ilidža prof. dr. Senaid Memić i direktor Fonda memorijala Suad Zijadić.

"Sredstva koja smo dobili od Općine namjenski ćemo iskoristiti za postavljanje nišana i spomen-obilježja šehidima, poginulim braniteljima i umrlim veteranima odbrambeno-oslobodilačkog rata. Trenutno radimo na postavljanju nišana umrlim veteranima, a prema Zakonu o dopunskim pravima boraca. Općina Ilidža je prepoznala važnost ovog projekta, kojim se čuva uspomena na učesnike proteklog rata koji su dali svoje živote i hvala Općini Ilidža na ovoj podršci", izjavio je Zijadić.

"Tradicionalno mi podržavamo aktivnosti Fonda i dalje ćemo nastaviti u skladu sa našim budžetkim sredstvima. Nadam se da će ova sredstva pomoći Fondu da nastave brigu o nišanima za sinove BiH. Mi održavamo i ostala spomen obilježja na našoj teritoriji i za tu svrhu izdvajamo sredstva" rekao je, između ostalog, načelnik Memić.

Finansijska sredstva u iznosu 10.000 KM Općina Ilidža će uplatiti na račun Fonda memorijala koji je u obavezi da raspiše javni poziv za izbor izvođača za navedene radove.



Obilježena godišnjica pogibije četvero djece u Velikom parku u Hrasnici

U organizaciji Udruženja logoraša Općine Ilidža i Općine Ilidža koja je finansijski podržala, 12. jula 2017. obilježena je godišnjica stradanja djece ispred spomen-obilježja u parku u Hrasnici pod nazivom "Da se ne zaboravi i ne ponovi".

Tim povodom predstavnici Općine Ilidža, Udruženja roditelja ubijene djece opkoljenog Sarajeva 1992-1995., rodbina i prijatelji proučili su Fatihu i položili cvijeće na mjesto stradanja nevine djece, te na taj način odali počast ovom zločinu te svijetu poručili da se ovakve stvari nikada ne smiju zaboraviti.

„Ovaj tužni dan, mora biti podsjetnik, šta se desilo 12. jula 1992. godine. Moramo pričati stalno da se ne zaboravi da je od ispaljene minobacačke granate sa lokaliteta stadiona u Vojkovićima u parku u Hrasnici ubijeno četvero djece. Ta djeca su tada izašla u park da se igraju gdje ih je pokosila



granata agresora. Rejon odgovornosti odakle je ispaljena granata je bila pod komandom Milana Majkovića, a za ovaj zločin niko još nije odgovarao "rekao je predsjednik Udruženja logoraša Općine Ilidža Enes Dželilović.

Tog kobnog dana ubijene su četiri nezužne duše, četvero djece i to: Azmir Brodarac (1976.), Sanela Hadžiomerović (1979.), Aldina (1979.) i Admir (1985.) Čolpa. Tom prilikom ranjeno je još četvero djece.



Internacionalni moto maraton "Da se ne zaboravi i ne ponovi"

Pet stotina učesnika 6. Internacionalnog moto maratona Srebrenica 2017. pod parolom "Da se ne zaboravi i ne ponovi" otišli su 10. jula iz Sarajeva, tačnije iz Ilidže, put Srebrenice na komemoraciju u Potočarima u povodu obilježavanja 11. jula, 22. godišnjice genocida u Srebrenici. Organizator moto maratona bio je Moto klub "Jahači iz predgrađa.

Pakleni vozači su se okupili 10. jula 2017. godine na parkingu ispred Energoinvesta na Ilidži, gdje je obavljeno akreditiranje učesnika, podjela majica i lunch paketa, nakon čega su u pratnji policije krenuli na defile kroz grad gdje su se zaustavili i položili cvijeće na spomen obilježje Djeca Sarajeva, a potom otišli prema Memorijalnom centru Potočari. I ove, kao i predhodne godine Općina Ilidža finansijski je podržala ovu humanu manifestaciju. Učesnike Moto maratona ispratio je načelnik Općine Ilidža prof. dr. Senaid Memić i zaželio im sretan put za Srebrenicu.

Među učesnicima maratona su motociklisti iz BiH, te susjedne Hrvatske, Slovenije, Italije, Njemačke, Švedske, Turske, i velikog broja drugih evropskih zemalja.

Gorska služba spašavanja i ove godine organizovala odlazak na Marš mira 2017.

Gorska služba spašavanja i Streljački klub Ilidža u saradnji i pod pokroviteljstvom Općine Ilidža sedmu godinu zaredom organizovali su Marš mira Ilidža-Nezuk-Srebrenica. Ovogodišnji učesnici 7. jula 2017. godine, njih 70, otišli su autobusom do Nezuka.

Sretan put i dobro zdravlje na ispraćaju poželio im je načelnik Općine prof. dr. Senaid Memić sa saradnicima.

"Marš mira je pješački pohod, koji se održava u sklopu obilježavanja godišnjice genocida nad Bošnjacima s ciljem odavanja počasti žrtvama genocida te podsjećanja na stravične zločine koji su su počinjeni u enklavi Srebrenica. Glavna poruka Marša je čuvanje sjećanja na nevino stradale Bošnjake Srebrenice i Podrinja i mi ćemo njegovati i širiti ideju čuvanja od zaborava. Općina Ilidža to radi već tradicionalno. Obaveza svih nas je podsjećati na zločine nad Bošnjacima Podrinja ali i cijele Bosne i Hercegovine," izjavio je, između ostalog, Memić.

Sudionici marša su se u Nezuku pridružili ostalim učesnicima marša odakle su nastavili put prema Memorijalnom centru u Potočarima, gdje su 11. jula prisustvovali kolektivnom ukopu i dženazi žrtvama genocida.





Premijera dokumentarnog filma “Čuvari kapije grada”

Na Ilidži je 27. jula pred oko 1.500 gledalaca, održana svečana premijera dokumentarnog filma “Čuvari kapije grada” koji govori o ratnom putu “Četvrtе viteške motorizovane brigade”. Premijera je upriličena u okviru obilježavanja 25. godišnjice od formiranja brigade koja je tokom rata čuvala Hrasnicu, Sokolović-Koloniju i Butmir, slobodne teritorije Ilidže i područje Igmana, a samim tim i kapiju opkoljenog Sarajeva.

Pred prikazivanje filma održan je i prigodan panel na kojem su o ratnom putu Brigade i filmu govorili njen ratni komandant general Fikret Prevljak, njegov tadašnji zamjenik i predsjednik Udruženja “Četvrtе viteške motorizovane brigade” Emir Redžović te Adnan Čuro iz “Source produkcije” koja je radila na realizaciji dokumentarnog filma “Čuvari kapije grada”.

“Čuvanje uspomene na naš ratni put i sve što je ta brigada značila za ove prostore, Sarajevo i Bosnu i Hercegovinu veoma je bitno i zbog toga želimo da čuvamo od zaborava, a ono što je nama posebno bitno jeste i stalna briga za porodice naših šehida i poginulih boraca koje nikada ne smijemo zaboraviti i kojima je film posvećen” rekao je između ostalog Redžović.



Snimanje dokumentarnog filma podržali su “Fond Memorijala - Fond Kantona Sarajevo za zaštitu i održavanje grobalja šehida i poginulih boraca, memorijalnih centara i spomen obilježja žrtava genocida”, Ministarstvo za boračka pitanja KS, Općina Ilidža i privrednici općine Ilidža.

Centralna manifestacija proslave 25. godina 104. viteške brigade

Centralnom manifestacijom na trgu ispred Doma kulture u Hrasnici 27. jula u prisustvu velikog broja građana i zvanica završeno je obilježavanje 25. godišnjice od formiranja “4. viteške motorizovane brigade” koja je tokom rata čuvala Hrasnicu, Sokoloviće, Butmir, slobodne teritorije Ilidže i područje Igmana.

“Na vama je bila velika odgovornost i na područjima Butmira, Hrasnice, Sokolović-Kolonije i Igmana. Četvrta viteška motorizovana brigada je sprečavala ulazak agresora u opkoljeno Sarajevo, čuvala je prohodnost Tunela D-B, brinula o opskrbi glavnog grada strujom, naftom, hranom... Veoma je bitno čuvati uspomenu na vaš ratni put i iznova podsjećati



Bosance i Hercegovce na to kome duguju svoju slobodu” rekao je federalni premijer Fadil Novalić.

Podsjetio je da se ne smiju zaboraviti ni porodice šehida i poginulih boraca.

Ministar za boračka pitanja Kantona Sarajevo Muharem Fišo u obraćanju je istakao kako je ovo vrijeme nakon rata, vrijeme u kojem svi trebaju pokazati ono što su pokazali tokom agresije na BiH.

- Trebamo pokazati da smo snaga, da smo jedinstveni, da znamo kad treba u ovoj zemlji biti jak. Večeras djeca naših najboljih sinova to pokazuju, pokazuju da ima ko da ovu zemlju voli, i da je brani - kazao je Fišo. Načelnik Općine Ilidža Senaid Memić također je podsjetio na zajedništvo koje je postojalo tokom rata, ali i na potrebu zajedništva i međusobnog poštivanja u miru, i čuvanja uspomene na borce, šehide i poginule borce.

“Pozivam vas da jedni druge više poštujemo, da jedni drugima vjerujemo i da gledamo šta je dobro za sutra. Da nastavimo raditi s ovom djecom ovdje, jer oni su isti kao što smo i mi bili, njima treba vjerovati i uz njih je naša budućnost zagarantovana, a naši neprijatelji nas ne vole zato što imamo mladost, što imamo ljepotu, što imamo srce i što smo složni” kazao je Memić.

Ratni komandant “4. viteške motorizovane brigade” Fikret Prevljak prisutne je pozvao da nikad ne zaborave šehide i poginule borce i da zajedno rade na tome kako ni jedna porodica ne bi ostala zaboravljena i kako ne bi ostala bez potrebne podrške.

“Bili smo na Golom brdu, kada je djevojka ispričala kako je svog heroja babu ispratila posljednji put, tada je bila mala i to je sve čega se sjećai što joj je ostalo kao uspomena na njega, sve ostalo što je saznala o njemu - saznala je od nas, družeći se, razgovarajući. Zato vas pozivam moji saborci, da budemo složni i jedinstveni, da se viđamo, i da pomažemo jedni drugima” rekao je Prevljak čestitajući 25. godišnjicu od formiranja “4. viteške motorizovane brigade”.



Obilježena godišnjica pogibije heroja na Golom brdu

U sklopu obilježavanja 25 godišnjice formiranja Četvrtе viteške motorizovane brigade 28. jula 2017. godine, zvaničnici, preživjeli saborci, porodice šehida, na čelu sa komandantom Četvrtе viteške brigade generalom Fikretom Prevljakom obišli su i položili cvijeće na mjesto stradanja Emira Bogunića - Čarlija, sestara Samire i Mevlide Elčić i Džemaila Bulbula na Golom Brdu.

Prisutnima se obratila i Adisa Bogunić, kćerka Emira Bogunića-Čarlija koja je u vrijeme njegove pogibije bila djevojčica.

“Ostale smo bez njega, ali ne i same. Uz nas su uvijek bili i danas su njegovi drugovi i saborci koji su tu za nas, i koji sve ove godine čuvaju uspomenu na mog rahmetli oca i ostale šehide i poginule borce” riječi su Adise Bogunić.

O detaljima akcije na Golom brdu i pogibiji Emira Bogunića-Čarlija, sestara Samire i Mevlide Elčić i Džemaila Bulbula govorio je i ratni komandant Četvrtе viteške motorizovane brigade Fikret Prevljak.

“Uz sjećanje na naše heroje, teško je ne spomenuti dvije sestre Elčić, Mevlidu i Samiru, njihovo herojstvo i put. Taj dan smo se rastali ovdje u podnožju, Mevlida je otišla u boj,



a Samiru sam ostavio jer nisam dao da idu obje sestre. Ali Samira se nekako iskrala kroz šumu i otišla za svojom sestrom.

Mevlida je poginula sa Čarlijem ovdje gdje sada stoji spomen-obilježje, a Samira je poginula pola sata poslije nedaleko odavde, rekao je Prevljak, te dodao da je ponosan na okupljanje saboraca jer ne daju da se zaborave ovi heroji.

“Njih četvero imaju ogromne zasluge koje ne smiju nikad biti zaboravljene“ dodao je general Fikret Prevljak.

Potom su brojne delegacije položile cvijeće na mezarju Emira Bogunića Čarlija i Ejuba Sarajkića Eke, ispred Doma kulture u Hrasnici.

Obilježena godišnjica „Bitke za Famos“

U organizaciji Udruženja porodica šehida i poginulih boraca Ilidža i Općine Ilidža, 4. avgusta 2017. godine u naselju Lasica u Hrasnici u prisustvu članova porodica poginulih, saboraca i općinskih zvaničnika, obilježena je 25. godišnjica „Bitke za Famos“ u kojoj je poginulo 27 boraca 104. viteške motorizovane brigade Armije Republike Bosne i Hercegovine. Brojne delegacije i članovi porodica šehida i poginulih boraca položili su cvijeće ispred spomen-obilježja u Lasici, ispred spomen-obilježja u Hrasnici i mezarju Kovači-Hrasnica gdje je proučena i Jasin dova.

Bitka za Famos je jedna od najznačajnijih bitaka koje su se odvijale te sudbonosne 1992. godine, bitka koje se moramo sjećati zbog velikog broja poginulih.

„Danas smo tužni, ali i ponosni na one koji su dali svoje živote za odbranu slobode, svojih porodica, svojih domova i oni su samo u jednom danu zaslužili Dženet. Svojim dolaskom i prisustvom

iskazujemo svoje poštovanje prema ovim žrtvama, spremnost da se i sami žrtvujemo za one koji dolaze. Trebamo biti ponosni na njih i njihove podvige. Nadam se da ćemo odavde otići plemenitiji i da ćemo ovaj dan nositi u srcu“, kazao je u svom obraćanju predsjedavajući Općinskog vijeća Ilidža Muhamed Omerović.





Održan Osmi međunarodni dječiji festival folklor

U periodu od 27. do 31. jula 2017. godine, Ilidža i Sarajevo su bili domaćini i kulturna prijestolnica dječijeg folklornog stvaralaštva iz sedam zemalja.

Udruženje za djecu i mlade "Nominativ" Ilidža, uspješno je organizovao osmi po redu Međunarodni dječiji festival folklor u saradnji sa KUD-om "Bašćaršija".

Na festivalu je učestvovalo preko 600 mališana iz Bugarske, Crne Gore, Česke, Grčke, Izraela, Srbije, Turske i Bosne i Hercegovine.

Građani općine Ilidža, kao i svi građani Kantona Sarajevo na Ljetnoj pozornici mogli su uživati u prelijepim nošnjama i igrom koju su nam ponudili učesnici iz navedenih zemalja. Veliku podršku u realizaciji festivala dala je Općina Ilidža, Grad Sarajevo, Evropski pokret u Bosni i Hercegovini, Ministarstvo kulture i sporta Kantona Sarajevo te mnogobrojni sponzori.

Završen još jedan međunarodni festival folklor u BiH "Čuvari tradicije"

Zahvaljujuću Udruženju za očuvanje tradicije i razvoj kulturno-umjetničkog stvaralaštva „Bašlija“, naša domovina ne treba da se brine za budućnost tradicionalnih vrijednosti. Vjerni folklorni čuvari ovog udruženja, ne samo da su istinski čuvari tradicije koji okupljaju djecu i mlade, već ih i edukuju o našoj bogatoj tradiciji, a uspjeli su u periodu od 16 do 21. avgusta ugostiti više od 300 učesnika iz Turske, Bugarske, Kipra, Makedonije i BiH. Povod ovog okupljanja bio je Drugi međunarodni festival folklor za djecu i mlade „Čuvari tradicije“.

„Najprije bih se zahvalio gostima koji su „prevalili“ dug kako bi uljepšali naš festival. Ovaj festival izrodio je nova prijateljstva i pozive za nove festivalske susrete. Želio bih se zahvaliti svim učesnicima, ali svakako Općini Ilidža, federalnom ministarstvu kulture i sporta, Upravi Grada Sarajeva i svima onima koji su doprinijeli da ovaj festival održi“ rekao je Džemo Hurić-organizator.



Prijem za učesnike Osmog međunarodnog festivala folklor

Općina Ilidža bila je domaćin Osmog međunarodnog dječijeg festivala folklor „Ilidža“ koji je održan od 27. do 31. jula 2017. godine. Tim povodom u Općini Ilidža 28. jula 2017. upriličen je prijem za učesnike ovog festivala. Domaćini, predstavnici Općine Ilidža Denis Muhović i Velida Memić poželjeli su dobrodošlicu gostima i izrazili nadu da će Ilidžu doživjeti kao mjesto u kojem su se lijepo osjećali i u koju će se ponovo vratiti.

„Želim vam ugodan boravak u našoj općini i uživajte u njenim ljepotama, družite se i dođite nam i sljedeće godine“, istakla je Velida Memić.

Gosti nisu krili svoje zadovoljstvo učešćem na festivalu, a posebno su zadivljeni ljepotom Ilidže i Bosne Hercegovine. Gosti i domaćini razmijenili su poklone, kao znak pažnje i sjećanja na ovaj susret.



Prijem za učesnike festivala folklor "Čuvari tradicije"


Načelnik Općine Ilidža prof. dr. Senaid Memić 17. avgusta 2017. godine upriličio je prijem za učesnike Međunarodnog festivala folklor za djecu i mlade „Čuvari tradicije“.

„Čast mi je i zadovoljstvo biti domaćin festivala folklor za djecu sa ovolikim brojem zemalja učesnica. Ilidža postaje centar folklor u regionu. Nadam se da će publika na Ilidži uživati u vašim igrama. Želim vam ugodan boravak u našoj općini i uživajte u njenim ljepotama, družite se i dođite nam i sljedeće godine“, kazao je načelnik Memić u svom obraćanju učesnicima festivala.

Gosti nisu krili svoje zadovoljstvo učešćem na festivalu, a posebno su zadivljeni ljepotom Ilidže i Bosne i Hercegovine. Gosti i domaćini razmijenili su poklone, kao znak pažnje i sjećanja na ovaj susret.



Prijem za vlasnike najljepših dvorišta i balkona



Kreativnost, trud i rad koji Mirsad Ožegović, već godinama ulaže u uređenje okruženja u kojem živi, u svoje dvorište, nagrađena je prvim mjestom na ovogodišnjem izboru najljepše uređenog dvorišta. Drugo mjesto pripalo je Munibi Ohranović, a treće Nikoli Vujniću.

Tim povodom načelnik Općine Ilidža prof. dr. Senaid Memić upriličio je prijem za nagrađene vlasnike najljepših dvorišta i balkona sa cvjetnim aranžmanom i uručio im nagrade. Prva nagrada za najljepše dvorište je 500 KM, druga 400 i treća 300 KM. Prva nagrada za najljepši balkon iznosila je 300 KM, druga, 200 KM i treća 100 KM.



“Ova nagrada je simbolična, ali se nadam da će biti samo stimulan da nastavite raditi na uređenju dvorišta, a samim tim i naše općine. Znam da je ovo posao koji zahtijeva rad i ljubav te vas molim da tako nastavite i ubuduće” rekao je, između ostalog, načelnik Memić.

Nagrađen je i najuređeniji balkon. Najljepši balkon ima Izeta Kapidžić, druga je Mejra Fajić, a treći Faik Memić.

“Želimo da na ovaj način doprinesemo ljepšem izgledu naših naselja, naše općine, a da zainteresiramo mlade ljude da uređen prostor daje bolji dojam svim posjetiocima, koji ovdje dođu” istakla je Muniba Ohranović.



Ljetovanje izviđača pomogla Općina Ilidža

Članovi Starješinstva Saveza izviđača Kantona Sarajevo 11. augusta, posjetili su izviđače Oreda izviđača „Rakovica 9“, na njihovom ovogodišnjem ljetovanju, koje su priredili, nedaleko od svog naselja Rakovica, u šumskom ambijentu, gdje je njih oko četrdeset, boravilo 10 dana. Boravili su u pravom izviđačkom ambijentu, družeći se i boraveći pod šatorima, pripremajući hranu na samom terenu, te savladavajući izviđačke vještine i polažući izviđačka vještinstva. Imali su i sanitetsko obezbjeđenje, nesebične članove Crvenog križa. Na rastanku bilo je i sjete i suza, ali se već pripremaju za naredne susrete, takmičenja i zimovanje. Projekat je realiziran zahvaljujući Općini Ilidža.

Održana prezentacija o modelima socijalnog stanovanja

U okviru projekta „Integrirana podrška raseljenim osobama i izbjeglicama u Bosni i Hercegovini, Crnoj Gori i Srbiji“ koji finansira Biro za populaciju, izbjeglice i migracije Vlade SAD-a 30. avgusta 2017. godine u Općini Ilidža održan je sastanak predstavnika CRS-a, općina Berane, Nikšić i Podgorica iz Crne Gore i predstavnika Općine Ilidža. Na sastanku su razmijenjena iskustva u oblasti socijalnog stanovanja koje je CRS implementirao u prethodnim godinama, te održana prezentacija o „Neprofitnom stanovanju u općini Ilidža“, a upriličen je i obilazak kolektivnog centra stanovanja u Hrasnici i stanova izgrađenih u okviru ovog projekta.

Boćari Ilidže državni prvaci

U organizaciji Boćarskog saveza BiH, 15. jula 2017. godine u Čapljini je održano državno prvenstvo BiH u pojedinačnim disciplinama. Nakon kvalifikacionih turnira koji su odigrani u Mostaru, Posušju, Ljubuškom i Neumu za finalno takmičenje plasiralo se osam takmičarskih parova.

Par BK „Napredak-Willa“ Muhidin Dizdarević i Drago Dodlek postali su državni prvaci BiH.

Vrijedan poklon biblioteci Doma kulture Hrasnica od NUBBIH

NUBBIH (‘‘Nacionalna i univerzitetska biblioteka Bosne i Hercegovine’’) je i ove godine biblioteci Doma kulture Hrasnica pružila značajnu pomoć u prikupljanju bibliotečke građe.

Pored književnih djela namijenjenih čitaocima različite starosne dobi, poklon od 272 bibliotečke jedinice (197 novih naslova) sadrži znatan broj univerzitetskih udžbenika, kao i drugu stručnu literaturu iz različitih naučnih disciplina i stručnih oblasti.



‘‘Zlatne ruke’’ i u Novoj Kasabi

U organizaciji ‘‘Zlatne ruke’’ ‘‘upriličena je posjeta porodicama u Novu Kasabu, smještenu nadomak Milića. Nova Kasaba je samo je jedno od stotina podrinskih naselja uz koje se najčešće vežu riječi genocid i masovne grobnice. Ipak i pored stravične prošlosti, stanovnici ovog naselja vratili su se kućama, a posjeta članica Zlatnih ruku je dokaz da nisu zaboravljeni.

Podijeljeno je 24 paketa sa higijenskim potrepštinama, odjeća i obuća.

‘‘Znamo da su potrebe velike, zato ćemo se mi i dalje zalagati da bude što više humanitarnih pomoći za ugrožene porodice. Zahvaljujemo se Općini i svim donatorima koji su zaslužni za ovu akciju ‘‘ rekla je Zlatija Dizdarević, predsjednica Udruženja ‘‘Zlatne ruke’’.



Rekonstruisana ulica Put Famosa u Hrasnici

U ilidžanskom naselju Hrasnica završeni su radovi na rekonstrukciji ulice Put Famosa u dužini od 1150 metara. U prvoj fazi u dužini 760 metara i širini 6,5 metara urađeno je struganje postojećeg asfalta i presvlačenje novim asfaltom, te zamjena oštećenih ivičnjaka. U drugoj fazi radova urađena je zamjena podtla, rješana odvodnja, ugrađeni novi ivičnjaci te položen novi asfalt u širini od sedam metara. Vrijednost radova je 275.000 KM a investitori su Općina Ilidža i Ministarstvo privrede Kantona Sarajevo.

